

МОНГОЛ УЛСЫН ХУУЛЬ

2018 оны ... дугаар
сарын ...-ны өдөр

Улаанбаатар
хот

ХАРИЛЦАА ХОЛБООНЫ ТУХАЙ ХУУЛЬД НЭМЭЛТ, ӨӨРЧЛӨЛТ ОРУУЛАХ ТУХАЙ

1 дүгээр зүйл. Харилцаа холбооны тухай хуульд доор дурдсан агуулгатай дараахь зүйл, хэсэг, заалт нэмсүгэй:

1/3 дугаар зүйлийн 3.1.14-3.1.20 дахь заалт:

3.1.14. “мэдээллийн технологи” гэж компьютер, харилцаа холбооны сүлжээ ашиглан цахим өгөгдлийг үүсгэх, боловсруулах, хадгалах, дамжуулах, аюулгүй байдлыг хангах, солилцох, үйлчилгээ үзүүлэх болон бусад тоног төхөөрөмжтэй холбогдох үйл ажиллагааг;

3.1.15. “зохицуулалт” гэж мэдээлэл, харилцаа холбооны чиглэлээр тусгай зөвшөөрөл олгох, сунгах, түдгэлзүүлэх, сэргээх, хүчингүй болгох, шилжүүлэх болон тусгай зөвшөөрлийн нөхцөл шаардлагыг тогтоохтой холбоотой журам батлах, гэрээ байгуулах, хяналт тавих, хууль тогтоомжид заасан асуудлаар шийдвэр гаргахтай холбогдсон цогц үйл ажиллагааг;

3.1.16. “домэйн нэр” гэж интернэтийн нөөцийн хаягийг тодорхойлох тухайн улсад тусгайлан олгосон үсэг, тоо, бусад таних тэмдгийн хослолыг;

3.1.17. “норматив баримт бичиг” гэж харилцаа холбооны үйл ажиллагааг явуулах шаардлагыг агуулсан норм, дүрэм, заавар, аргачлалыг;

3.1.18. “харилцан холболт” гэж хоёр үйлчлэгчийн сүлжээ хоорондын холболтыг;

3.1.19. “сүлжээнд холбогдох” гэж үйлчлэгч нь өөрийн үйлчилгээг хэрэглэгчид хүргэх зорилгоор сүлжээ бүхий үйлчлэгчийн сүлжээнд холбогдохыг;

3.1.20. “баталгаажуулах” гэж харилцаа холбооны тоног төхөөрөмж, бүтээгдэхүүн тогтоосон шаардлагад нийцэж байгааг итгэмжлэгдсэн эрх бүхий этгээд бичгээр тодорхойлохыг.”

2/5 дугаар зүйлийн 5.1.4, 5.1.5 дахь заалт:

“5.1.4.харилцаа холбоо, мэдээллийн технологид тулгуурласан бүтээгдэхүүн, үйлчилгээг нэвтрүүлэх нэгдсэн бодлого, хөтөлбөрийг батлах, хэрэгжилтийг зохион байгуулах;

5.1.5.харилцаа холбоо, мэдээллийн технологийн чиглэлээр мэдлэг шингэсэн өндөр технологи, экспортын чиг баримжаатай үндэсний үйлдвэрлэлийг хөгжүүлэх, бодлогын судалгаа шинжилгээний байгууллага байгуулах, түүний дүрэм болон холбогдох зардлыг санхүүжүүлэх журам батлах.”

3/6 дугаар зүйлийн 6.1.14-6.1.20 дахь заалт:

“6.1.14.харилцаа холбооны тухай хууль тогтоомжийг хэрэгжүүлэхтэй холбогдсон дүрэм, журам, заавар, харилцаа холбооны салбарын хөгжлийн талаар баримтлах чиглэл, төлөвлөгөөг батлах, биелэлтийг зохион байгуулах;

6.1.15.бүх нийтэд харилцаа холбоо, мэдээллийн технологид тулгуурласан бүтээгдэхүүн, үйлчилгээг хэрэглэх талаар мэдлэг, боловсрол эзэмшүүлэх бодлогыг холбогдох төрийн захиргааны төв байгууллагатай хамтран боловсруулах;

6.1.16.бусад салбарын болон салбар хоорондын харилцаа холбоо, мэдээллийн технологийн хэрэглээ, төсөл, хөтөлбөрийн уялдаа холбоог хангах нэгдсэн бодлого боловсруулах, хэрэгжүүлэх;

6.1.17.харилцаа холбоо, мэдээллийн технологийн чиглэлээр төр, хувийн хэвшил, судалгаа шинжилгээний байгууллагын судалгаа шинжилгээний ажиллагааг уялдуулах бодлого боловсруулах, хэрэгжилтэд нь хяналт тавих;

6.1.18.харилцаа холбоо, мэдээллийн технологийн инновацийг хөгжүүлэх үйлдвэрлэлийн цогцолбор байгуулах бодлого боловсруулах, хэрэгжилтийг зохион байгуулах, үйл ажиллагааг нь дэмжих;

6.1.19.харилцаа холбоо, мэдээллийн технологийн чиглэлээр үйл ажиллагаа эрхэлж байгаа төрийн өмчит болон төрийн өмчийн оролцоотой хуулийн этгээдийн үйл ажиллагаанд хяналт шинжилгээ хийх, хэрэгжилтийг хангуулах арга хэмжээ авах;

6.1.20.харилцаа холбоо, мэдээллийн технологийн бүтээгдэхүүний оюуны өмч, зохиогчийн эрхийг хамгаалах бодлого боловсруулах, хэрэгжилтэд нь хяналт тавих;”

4/6¹ дүгээр зүйл:

“6¹ дүгээр зүйл.Харилцаа холбоо, мэдээллийн технологийн талаархи салбар хоорондын үйл ажиллагаа

6¹.1.Монгол Улсад харилцаа холбоо, мэдээллийн технологи нэгдмэл бодлого, төлөвлөлттэй байна.

6¹.2. Дараахь байгууллага харилцаа холбоо, мэдээллийн технологид тулгуурласан бүтээгдэхүүн, үйлчилгээг нэвтрүүлэх ажлыг харилцаа холбооны асуудал хариуцсан төрийн захиргааны байгууллагатай хамтран зохион байгуулна:

6¹.2.1. төрийн захиргааны төв байгууллага, тухайн асуудлыг эрхэлсэн төрийн захиргааны төв байгууллага байхгүй бол төрийн захиргааны байгууллага;

6¹.2.2. Засгийн газрын бус бие даасан агентлаг, түүнтэй адилтгах нийтийн эрх зүйн бусад байгууллага;

6¹.2.3. Шүүхийн ерөнхий зөвлөл;

6¹.2.4. Улсын ерөнхий прокурорын газар.

6¹.3. Төрийн захиргааны төв болон төрийн захиргааны байгууллага Засгийн газраар шийдвэрлүүлэх харилцаа холбоо, мэдээллийн технологийн нэгдсэн бодлого, төлөвлөлтийн хүрээний асуудлаар харилцаа холбооны асуудал хариуцсан төрийн захиргааны байгууллагын саналыг авсан байна.

6¹.4. Салбар хооронд харилцаа холбоо, мэдээллийн технологид тулгуурласан бүтээгдэхүүн, үйлчилгээг нэвтрүүлэх, нэгдсэн бодлого, төлөвлөлтийн асуудлыг харилцаа холбооны асуудал хариуцсан төрийн захиргааны байгууллагын саналыг үндэслэн Засгийн газар шийдвэрлэнэ.

6¹.5. Төрийн захиргааны төв болон холбогдох төрийн захиргааны байгууллага, нутгийн захиргааны байгууллага харилцаа холбоо, мэдээллийн технологид тулгуурласан бүтээгдэхүүн, үйлчилгээнийхээ хэрэгжилтийн явцад хоёр жил тутам хяналт-шинжилгээ, үнэлгээ хийж, тайланг хяналт шинжилгээ, үнэлгээ хийсний дараагийн жилийн эхний улиралд багтаан харилцаа холбооны асуудал хариуцсан төрийн захиргааны байгууллагад ирүүлнэ.

6¹.6. Энэ хуулийн 6¹.5-д заасан бүтээгдэхүүн, үйлчилгээний хэрэгжилтэд харилцаа холбооны асуудал хариуцсан төрийн захиргааны байгууллага Хөгжлийн бодлого төлөвлөлтийн тухай хуулийн 20.2-т заасан журмын дагуу дөрвөн жилд нэг удаа үнэлгээ хийнэ.”

5/9 дүгээр зүйлийн 9.1.14-9.1.16 дахь заалт:

“9.1.14. интернэтийн домэйн нэрийн чиглэлээр зохицуулалтын баримт бичиг батлах, хэрэгжилтэд нь хяналт тавих;

9.1.15. тусгай зөвшөөрөлгүйгээр эрхлэх харилцаа холбооны үйлдвэрлэл, ашиглалт, үйлчилгээг бүртгэхтэй холбогдсон журам батлах;

9.1.16. Зохицуулах хорооны ажлын албаны жилийн төлөвлөгөө, төсвийг батлах;

6/25 дугаар зүйлийн 25.2.10 дахь заалт:

“25.2.10. зохицуулалтын үйлчилгээний хөлс төлөх;”

7/27 дугаар зүйлийн 27.1.4 дэх заалт:

“27.1.4.нийтийн үйлчилгээний харилцаа холбооны сүлжээний хэвийн ажиллах нөхцөлийг хангах.”

8/27 дугаар зүйлийн 27.2 дахь хэсэг:

“27.2.Нийтийн үйлчилгээний харилцаа холбооны сүлжээг хувийн өмчлөл, эзэмшил, нийтийн эдэлбэрийн газар, барилга байгууламж болон нийтийн зориулалттай орон сууцны байшингийн дундын өмчлөлийн хэсгээр дамжуулан гэрээний үндсэн дээр байрлуулж болох бөгөөд энэ тохиолдолд иргэн, аж ахуйн нэгж, байгууллага харилцаа холбооны тоног төхөөрөмж дээр ажиллах зөвшөөрлийг саадгүй олгох үүрэгтэй.”

9/30 дугаар зүйлийн 30.3, 30.4 дэх хэсэг:

“30.3.Харилцаа холбооны асуудал хариуцсан төрийн захиргааны байгууллагын дарга харилцаа холбооны хяналтын улсын ерөнхий байцаагч байна. Ерөнхий байцаагчийн эрхийг Засгийн газар олгоно.

30.4.Харилцаа, холбооны хяналтын улсын ерөнхий байцаагч Төрийн хяналт шалгалтын тухай хуулийн 10.9, 10.12-т заасан бүрэн эрхийг хэрэгжүүлнэ.”

10/30¹ дүгээр зүйл:

“30¹ дүгээр зүйл.Харилцаа холбоо, мэдээллийн технологийн аудит

30¹.1.Харилцаа холбоо, мэдээллийн технологийн аудитыг харилцаа холбооны асуудал хариуцсан төрийн захиргааны байгууллагаас эрх авсан хуулийн этгээд эрхлэн гүйцэтгэнэ.

30¹.2.Харилцаа холбоо, мэдээллийн технологийн аудит хийх иргэн, хуулийн этгээдэд тавигдах шаардлага, эрх олгох журам, харилцаа холбоо, мэдээллийн технологийн аудит хийх аргачлалыг харилцаа холбооны асуудал хариуцсан төрийн захиргааны байгууллагын дарга батална.

30¹.3.Харилцаа холбоо, мэдээллийн технологийн аудит хийлгэх байгууллагын жагсаалтыг Засгийн газар батална.

30¹.4.Энэ хуулийн 30¹.3-т заасан байгууллага хоёр жил тутам харилцаа холбоо, мэдээллийн технологийн аудит хийлгэж, холбогдох дүгнэлт, зөвлөмжийг хэрэгжүүлсэн тайлангаа харилцаа холбооны асуудал хариуцсан төрийн захиргааны байгууллагад ирүүлж, тайланг олон нийтэд нээлттэй, ил тод байлгана.

30¹.5.“Харилцаа холбоо, мэдээллийн технологийн аудит” гэж тухайн байгууллагад ашиглаж байгаа харилцаа холбоо, мэдээллийн технологийн бүтээгдэхүүн, үйлчилгээ, шийдэл, хэрэгжүүлсэн төсөл, хөтөлбөр нь стандартын биелэлт, байгууллагын үйл ажиллагааг дэмжих стратегийн зорилтыг хангаж байгаа эсэхийг хөндлөнгийн этгээдээс тогтоох хараат бус үйл ажиллагааг ойлгоно.”

2 дугаар зүйл. Харилцаа холбооны тухай хуулийн 3 дугаар зүйлийн 3.1.1 дэх заалтын “утас,” гэсний дараа “радио долгион,” гэж, “цамхаг” гэсний дараа “, байр, талбай” гэж, 8 дугаар зүйлийн 8.1 дэх хэсгийн “бүрдүүлэх,” гэсний дараа “зохицуулалт хийх,” гэж, 9 дүгээр зүйлийн 9.1 дэх хэсгийн “Зохицуулах хороо” гэсний дараа “харилцаа холбооны талаар төрөөс баримтлах бодлогын хүрээнд” гэж, 9 дүгээр зүйлийн 9.1.4 дэх заалтын “холболт хийх” гэсний дараа “, сүлжээнд холбогдох” гэж, “батлах” гэсний дараа “, хэрэгжилтэд нь хяналт тавих” гэж, 9.1.5 дахь заалтын “давамгайлж буй” гэсний өмнө “зүй ёсны монополь болон” гэж, “хянах” гэсний дараа “, батлах” гэж, 26 дугаар зүйлийн 26.1.1 дэх заалтын “тоног төхөөрөмж” гэсний дараа “, программ хангамж” гэж тус тус нэмсүгэй.

3 дугаар зүйл. Харилцаа холбооны тухай хуулийн зарим зүйл, хэсэг, заалтыг доор дурдсанаар өөрчлөн найруулсугай:

1/6 дугаар зүйлийн 6.1.2, 6.1.3 дахь заалт:

“6.1.2.харилцаа холбооны талаар төрөөс баримтлах бодлого боловсруулах, биелэлтийг зохион байгуулах;

6.1.3.харилцаа холбооны салбарын өрсөлдөөн, үнэ тариф тогтоохтой холбогдсон журам батлах;”

2/6 дугаар зүйлийн 6.1.9, 6.1.10 дахь заалт:

“6.1.9.үндсэн сүлжээний оновчтой бүтцийг бий болгох, техник, технологи нэвтрүүлэхэд чиглэсэн хөгжлийн бодлогыг боловсруулах, хэрэгжилтийг зохион байгуулах;

6.1.10.үндсэн сүлжээг өргөтгөн хөгжүүлэх стратеги төлөвлөгөөний төсөл боловсруулах, хэрэгжилтэд нь хяналт тавих;”

3/8 дугаар зүйлийн 8.7 дахь хэсэг:

“8.7.Зохицуулах хорооны дарга, ажлын албаны холбогдох нэгжийн ажилтан харилцаа холбооны улсын байцаагчийн эрхтэй байна.”

4/9 дүгээр зүйлийн 9.1.2, 9.1.3 дахь заалт:

“9.1.2.хуульд заасан тусгай зөвшөөрөл олгох, хугацааг сунгах, тусгай зөвшөөрөлд нэмэлт, өөрчлөлт оруулах, тусгай зөвшөөрлийг түдгэлзүүлэх, сэргээх, хүчингүй болгох, тусгай зөвшөөрлийн нөхцөл, шаардлага болон холбогдох журмыг батлах, гэрээ байгуулах, биелэлтэд хяналт тавих;

9.1.3.харилцаа холбооны сүлжээний болон хэрэглэгчийн тоног төхөөрөмжийг баталгаажуулах, холбогдох техникийн нөхцөл, шаардлага, нормативын баримт бичиг батлах, хэрэгжилтэд нь хяналт тавих;”

5/12 дугаар зүйлийн 12.1 дэх хэсэг:

“12.1.Зохицуулах хороо Аж ахуйн үйл ажиллагааны тусгай зөвшөөрлийн тухай хуулийн 15.16-д заасан үйл ажиллагааг эрхлэх хуулийн этгээд, иргэнд тусгай зөвшөөрөл олгоно.”

6/21 дүгээр зүйл:

“21 дүгээр зүйл.Дотоодын хэрэглээний холбооны сүлжээ

21.1.Аж ахуйн нэгж, байгууллага дотоодын хэрэглээний холбооны сүлжээг дотооддоо ашиглах болон өөрийн салбар, төлөөлөгчийн газар хоорондын үйл ажиллагаанд ашиглах зориулалтаар хот, сум, суурин газарт байгуулж болно.

21.2.Зохицуулах хороо энэ хуулийн 21.1-д заасан дотоодын хэрэглээний холбооны сүлжээг бүртгэх, хязгаарлалт тогтоох, зохицуулах журмыг баталж, хэрэгжилтэд нь хяналт тавина.”

7/22 дугаар зүйлийн 22.3 дахь хэсэг:

“22.3.Харилцаа холбооны сүлжээ хоорондын харилцан холболт болон сүлжээнд холбогдох зааглах цэгийг Зохицуулах хороо тогтооно.”

8/25 дугаар зүйлийн 25.2.2 дахь заалт:

“25.2.2.харилцаа холбооны стандарт, техникийн нөхцөл, шаардлага, норматив баримт бичгийг мөрдөх, хуульд заасны дагуу баталгаажуулсан тоног төхөөрөмж ашиглах;”

4 дүгээр зүйл.Харилцаа холбооны тухай хуулийн 1 дүгэээр зүйлийн 1.1 дэх хэсгийн “хамгаалахтай” гэснийг “хамгаалах, зах зээлийн үр өгөөжтэй, шударга өрсөлдөөнийг дэмжих, иргэн, хуулийн этгээдийг харилцаа холбоо, мэдээллийн технологийн чанартай бүтээгдэхүүн, үйлчилгээгээр хүртээмжтэй хангахтай” гэж, 3 дугаар зүйлийн 3.1.5 дахь заалтын “15.8.7-д заасан үйлчилгээ” гэснийг “15.16-д заасан үйл ажиллагаа” гэж, 5 дугаар зүйлийн 5.1.1 дэх заалтын “баримтлах төрийн бодлого хэрэгжүүлэх” гэснийг “төрөөс баримтлах бодлогыг батлах” гэж, 6 дугаар зүйлийн гарчиг, мөн зүйлийн 6.1 дэх хэсэг, мөн зүйлийн 6.2 дахь хэсгийн “эрхэлсэн” гэснийг “хариуцсан” гэж, 8 дугаар зүйлийн 8.6 дахь хэсгийн “Мэргэжлээрээ 5-аас доошгүй жил ажилласан, дараахь шаардлагыг хангасан Монгол Улсын иргэнийг Зохицуулах хорооны дарга, гишүүнээр томилно:” гэснийг “Харилцаа холбооны салбарт мэргэжлээрээ 10-аас доошгүй жил, түүнээс 3-аас доошгүй жил удирдах албан тушаалд ажилласан, дараахь шаардлагыг хангасан Монгол Улсын иргэнийг Зохицуулах хорооны даргаар, мэргэжлээрээ 5-аас доошгүй жил ажилласан, дараахь шаардлагыг хангасан Монгол Улсын иргэнийг Зохицуулах хорооны гишүүнээр томилно:” гэж, 9 дүгээр зүйлийн 9.1.6 дахь заалтын “бүрдүүлэх” гэснийг “бүрдүүлэхэд өрсөлдөөнт болон өрсөлдөөн хязгаарлагдаж байгаа зах зээлд зохицуулалт хийхтэй холбогдсон журам батлах, хэрэгжилтэд нь хяналт тавих” гэж, 20 дугаар зүйлийн 20.1 дэх хэсгийн “иргэний хамгаалалт” гэснийг “гамшгаас хамгаалах” гэж, 31 дүгээр зүйлийн 31.3 дахь хэсгийн “ажлын 10 хоногийн” гэснийг “30 хоногийн” гэж, 6 дугаар зүйлийн 6.1.14 дэх заалтын дугаарыг “6.1.21” гэж, 9 дүгээр зүйлийн 9.1.14 дэх

заалтын дугаарыг “9.1.17” гэж, 25 дугаар зүйлийн 25.2.10 дахь заалтын дугаарыг “25.2.11” гэж тус тус өөрчилсүгэй.

5 дугаар зүйл.Харилцаа холбооны тухай хуулийн 8 дугаар зүйлийн 8.11 дэх хэсгийн “Зохицуулах хорооны жилийн төсвийг Засгийн газар батална.” гэсэн 1 дэх өгүүлбэрийг хассугай.

6 дугаар зүйл.Харилцаа холбооны тухай хуулийн 4 дүгээр зүйл, 6 дугаар зүйлийн 6.1.11 дэх заалт, 9 дүгээр зүйлийн 9.1.10 дахь заалтыг тус тус хүчингүй болсонд тооцсугай.

7 дугаар зүйл.Энэ хуулийг ... оны ... дугаар сарын ...-ны өдрөөс эхлэн дагаж мөрдөнө.

Гарын үсэг